

# HUANIJA ETEHUE'YO EBIONEI

## 1 JUAN

---

### Huaniya tehue canaje eba'e tiitii'yojjijo

**1** <sup>1</sup>Epeeji cuana, eyaya, Huaniya miquiana que esohui tehueña Jesosa Quitojo. Yahuajo nei nei meshi, aquiana cuana, dejja pea'ai pana coo jjimahuajo oya yaña tii tiia poa. Jamajjeya Jesosa Quitohua eseya Eyacuiñajji ba mee cani, eseya ba'e tiitii mee cani pea'ai. E'e jojo nei eyaya oya shajja'ajjanaje ecue eshajjaa. Eyaya oya banaje ecue ecojjaa. O ba neinei majje eya quea bihui nee poanaje. Oya ese jayojjaya poanaje, yamijji. Jamajjeya eya onijje jjapeequinaje. <sup>2</sup>E'e, Jesosa ese jayojja poeyanaje yamijji, ese ba'e tiitii mee'yohua. Eyaya oya banaje e'e jojo nei. Jamajjeya eyaya miquianaya jama huohuime aña ba'a: Yahuajo nei nei Jesosa Quito yaña tiitiia poa Eyacuiñajji nijje, oja Chii nijje. Eseja Chii neiya Eyacuiñajjiya oya meshi yasijje huoojea canaje ese jayojja epojji, yamijji. Esejaya mimishi cuijea'yo majje ohuaya eseya cuana ba'e tiitii mee caje'yo onijje eyajo. <sup>3</sup>E'e, eyaya oya, Jesosa Quito banaje; ojaya esohui shajja'ajjanaje pea'ai. Jamajjeya aje jja mi oe eyaya miquianaya huohuiana enijje ejjapeequi'yojji. Jamajjeya eseya Eyacuiñajji nijje, eseja Chii nei nijje jjapeequiani, oja Bacua Ejja Jesosa Quito nijje pea'ai jjapeequi poquiani. <sup>4</sup>Jamajjeya jiquio esohui cuana eyaya tehueña miquiana quea bihui nee nee po meeji. Jamajjeya Jesosaja epeeji poanijo quea bihui nee nee poaje'yo.

### Eyacuiñajji quea ja'a nee nee enequi tii mimishi'ama

<sup>5</sup>Epeeji cuana, eyaya Jesosa Quitoja esohui shajja'ajjanaje. Maya eyaya miquianaya huohuiana jama ba'a: Eyacuiñajji quea ja'a nee nee poani tii. Jiquio ecua cuaquijjiya mecajje jijinequianiya ojjaña jeaja'a cani jayojja jama ohuaya eseya cuana, dejja mimishi cuana quea ja'a nee jjashahuabaqui mee cani. Eyacuiñajji mimishi'ama tii tii, quea tai pojjeama; Eyacuiñajji quea apo pojjeama epojjajo jama tii tii oya ba'e. <sup>6</sup>Jamajjeya joya mimishi po majje quea apo jayojja tii ba'yani mimiani jama ba'a: —Eya Eyacuiñajji nijje jjapeequiani —Eyacuiñajji nijje jjapeequiani poso oya jjabaquiani, sijje poani.

Chojja. Jjapee neinei-quiani pojjeama mi coma, jjadasiaquiani jja mi coma. Jiquio ecua se mecajje quea misijo poquiquehuani jayojja jama oya poani. <sup>7</sup>Eyacuiñajji ca ca quea ja'a nee nee poani tii, quea boejea nee nee. Jamajjeya Eyacuiñajji jayojja jama quea ja'a nee ba'yanijo eseya jjapeequiani quea pame nee Jesosaja epeeji cuana nijje. Jesosa Quitoja ena' cuayaqui'yo majje oya esejo mano'yonaje. Jamajjeya onijje jjapeequianijo, eseja Chii Eyacuiñajjiya esejaya mimishi cuana cuijea ca poqui'yani.

<sup>8</sup>Ojjaña joya jama poani ba'a: —Iña ca ca mimishi'ama —jamaya quea quehua jjashahuabaquiani. Jamaya jjabaquianijo Jesosa ojaya ba jjima nei nei.

<sup>9</sup>Eyacuiñajji nijje mimiajo ca ca ohuaya esejaya mimishi cuana cuijea caje'yo. E'e, jama poajo ba'a: —Eyacuiñajji, eya quea mimishi poani. ¡Ecuea mimishi cuana cuijea'yocue! —jamaya mimiajo ohuaya ojaya esohui jayojja jama acaje'yo e'e jojo nei.

E'e, Jesosa esejaya mimishi cuanajo mano'yonajejo ohuaya eseja mimishi cuana cuijea'yo majje mimishi pajea meesahua caje'yo. Eseyá quea boejea po mee caje'yo. <sup>10</sup>E'e, Eyacuiñajjiya jama aca poa ba'a: —Ojjaña cuana quea mimishi nee nee poani —ohuaya aca poa.

Jamajjeya ojjaña joya jama poani ba'a: —Chojja, iña ca ca mimishi'ama —jama poaniya siajjepojji. Eyacuiñajji siajje poani posoya acani pea'ai. Jamajjeya ojjaña joya jama poani Eyacuiñajjiya esohui etehue'yo ba po jjima jayojja poani.

### Jesosa Quito esejo mimiani Eyacuiñajji nijje

**2** <sup>1</sup>E'e ecuea epeeji cuana, miquiana mimishi'ama po meesahuajji eyaya jiquio esohui tehueaña. Jamatii eseya quea mimishi poajo, Jesosa Quito esejo mimiani Eyacuiñajji nijje, oja Chii nijje jama ba'a: —Ecue Chii, eya mano'yonaje ecuea epeeji cuanaja mimishi cuana cuijea'yojji sosejje. Jamajjeya ja'a quea quene pojji onijje! —jamaya Jesosa poani.

Jesosa Quito ca ca oe mimishi'ama, quea pame nee nee. Jamajjeya Eyacuiñajjiya Jesosa onijje mimiajo shajja'ajja cani, jamaya acani esejo. <sup>2</sup>E'e, Jesosa acui ecueata'apeejo mano'ya poa eseja mimishi cuana cuijea'yojji sosejje. Ojjaña cuana ojjaña meshijo ba'eca cuanaja mimishi cuijea'yojji sosejje Jesosa mano'yonaje.

### ¡Eyacuiñajjiya esohui jayojja jama ba'ecue!

<sup>3</sup>E'e ecuea epeeji cuana, Jesosaja esohui cuana jayojja jama añajo eseya ojaya epeeji poani e'e jojo nei; onijje ba'e tiitiije'yo eyajo. Jamaya esejaya eba. <sup>4</sup>Beca cuana aje oe jama poani ba'a: —Eya ca iña Jesosaja epeeji poani —jama posoya jjabaquiani cuana.

Jamatii oya cuana aje oe Jesosaja esohui jayojja jama ba'e ajja. Jamajjeya oya cuana siajje poani. Jesosa ojaya ba jjima. <sup>5</sup>Ojjaña joya Eyacuiñajji quea jea nee nee ajji poani ca ca ojaya esohui jayojja jama ba'yani. Jamajjeya ¡Eyacuiñajjiya esohui jayojja jama ba'e tiitiicue Jesosa

Quitoja epeeji quea ja'a nee epojji! <sup>6</sup>Jamajjeya ojjaña joya e'e jojo nei jama poani ba'a: —Eya Jesosa Quito nijje jjapeequiani —jamaya poanijo ¡quea pame nee nee caba'yahua, Jesosa Quitohua aca poa jayojja jama ca'a cahua! Jamaya ba'yanijo eseya e'e jojo nei ojaya epeeji jjabaquije.

**¡Pea cuana quea jea nee nee acue!**

<sup>7</sup>Epeeji cuana, yahuajo nei Eyacuiñajjija esohui huohuijjiya esohui tehue ca poa miquianaja ebajji. Ma esohui miquianaaya shajja'ajjanaje Jesosa nijje jjapeequi jeahuaa. Ma esohui etehue'yo eyaya tehue o'oyaña miquiana jjashahuabaqui meejji. <sup>8</sup>Jamatii eyaya ma esohui tehue etii jayojjaya tehue o'oyaña miquiana huasijje jama ba'a: —¡Pea cuana quea jea nee nee acue!

Jiquio esohui jayojja jama aca poa Jesosaa; pea cuana quea jea nee nee aca poa. Yahuajo ojjañaja ejjashahuabaquijji cuana quea tai, quea quehua poa Eyacuiñajjija esohui e'e nei shajja'ajja jjimahuajo. Jjeya ca ca miquianaaya Eyacuiñajjija esohui jama pea cuana quea jea nee nee añña pea'ai. Ma esohui e'e nei cuaquijji jayojja jamaa ojjaña quea ja'a jjashahuabaqui meesahua cani. <sup>9</sup>Jamajjeya ojjaña joya jama poani ba'a: —Eya Jesusaja esohui jayojja jama ba'yani quea ja'a nee —jamaya poani aje oe sijje poani.

Jesosaja epeeji nijje quea quene nee poani tii tiijo quea mimishi nee ba'yani, Jesusaja esohui shajja'ajja nisho cani, Jesusaja epeeji e'e jojo nei pojjeama. <sup>10</sup>Ojjaña joya Jesusaja epeeji cuana quea jea nee nee acani ca ca quea ja'a nee nee ba'yani. Jesosa jayojja jama ba'yani. Jamajjeya ohuaya pea epeeji poquiquehua mee'yo jjima acani, quea mimishi po mee'yo jjima acani. <sup>11</sup>Ojjaña joya Jesusaja epeeji cuana nijje quea quene nee nee poani ca ca quea mimishi tii ba'yani. Jiquio ecua se ecojja bebo poqui taiyani jama, ejiojji ba jjima jayojja jama oya cuana poani quea mimishi ba'yani jjejojo.

**¡Jesusaja epeeji cuana etii, esho'i pea'ai quea ja'a nee ba'ecue!**

<sup>12</sup>Ecua epeeji cuana, miquianaya Jesusaja epeeji poanijo, Eyacuiñajjija miquea mimishi cuana cuijea ca'yonaje. Jamajjeya eyaya jiquio esohui tehueña miquianajaya ebajji. <sup>13</sup>Yahuajo nei nei meshi pana jjimahuajo Jesosa eba'e tiitiia poa. Jesosa nijje jjapeequianijo eyaya miquiana huasijje esohui tehueña edejja tii cuana huasijje. Shacuima' nequi cuana, miquianaya Edosiquiana jeabichajea'yojji epo. Jamajjeya eyaya miquiana huasijje esohui tehueña pea'ai. Esho'i cuana, Eyacuiñajji eseja Chii nei miquianajaya eba. Jamajjeya eyaya miquiana huasijje tehueña pea'ai. <sup>14</sup>E'e edejja tii cuana, Jesosa yahuajo nei nei eba'e tiitiia poa miquianajaya eba. Jamajjeya eyaya esohui tehueña miquianajaya ebajji. E'e shacuima' nequi cuana, miquianaya quea ca'a poani, dejja tii'yo jjima. Eyacuiñajjija esohui jayojja jama añña. Jamajjeya miquianaya Edosiquiana jeabichajea'yojji epo pea'ai. Jamajjeya eyaya miquiana huasijje tehueña pea'ai.

**¡A'a yahuajo jama ba'e sa pojji Jesusaja epeeji pojjeama jama!**

<sup>15</sup>Epeeji cuana, ¡a'a yahuajo jama ba'e sa pojji quea mimishi, Jesusaja epeeji pojjeama jama! Aquiana cuana jiquio meshijo ani ¡a'a quea jea nee ajji! ¡A'a aquianajo jjashahuaba tiitiquiji! E'e, Jesusaja epeeji pojjeama jama ba'e sa poanijo, aquiana cuanajo jjashahuaba tiitiquianijo pea'ai Eyacuiñajji, eseja Chii nei miquea quea boti pojjeama. <sup>16</sup>E'e, Jesusaja epeeji pojjeama cuana Eyacuiñajjijo jjashahuabaqui ajja nei nei. Chojja, oya cuana jjashahuabaquiani jiquio meshijo eba'ejjijo jama ba'a: Quea mimishi nee nee ba'e sa poani; aquiana cuana ba majje jea ba neinei cani pea'ai; quea dejja tai poani, quea nishehui pea'ai poani. Dejja quea dejja tai jayojja jama ba'e sa poani quea aquiana huiso nee nee. Ona huojeajji po sa poani pea'ai. Jamaya ba'e sa poani eshahuaja epeeji cuana. <sup>17</sup>Jamatii joya aquiana ojjaña cuana sa neinei poani chama'yo tii poaje'yo. Ojjaña quea mimishi nee jjashahuabaquiani, Jesusaja epeeji pojjeama quea nee nee poaje'yo tii tii. Ojjaña joya Eyacuiñajjija esohui jayojja jama ba'yani ca ca ba'e tiitije'yo onijje eyajo. Jamajjeya ¡yahuajo jama a'a ba'ejji, Jesusaja epeeji pojjeama jama!

Jesosa Quito cuiajji epojji nisho poeje, Emeshi Mese nei nisho poaje. Eseyca ca ca Jesusaja epeeji e'e jojo nei poani. <sup>18</sup>Ecuea epeeji cuana, ¡shajja'ajjacue mo! Yahuajo eyaya miquianaya huohuinaje jama ba'a: —Quijje Jesosa poe jjimahuajo oe dejja poeje. Oya pea, Edosiquiana neija epeeji; dejja jayojja nei neiya oya poeje. Jesosa Quito cuiajji nisho poaje; ojjañaja Emeshi Mese nei nisho poaje —jamaya eyaya huohuinaje.

Jamatii jjeya nei Jesosa Quito cuiapanajji poani yani, emeshi mese nei nisho quea huiso yani pea'ai. Jamajjeya esejaya eba Jesusaja epoe o'oyajji beshahua nei apoa. <sup>19</sup>Jiquio Jesosa Quito cuiapanajji poani cuana yahuajo pishana ese nijje nequinaje. Jamatii oya cuana Jesusaja epeeji nei pojjeama poa. Jamajjeya ese nijje nequi tiitii ajja poa. E'e, oya cuana Jesusaja epeeji nei epo jjemo ese nijje nequi tiitii'yo quiaye. Oya cuana ca ca poqui'yonaje. Jamajjeya esejaya eba oya cuana Jesusaja epeeji nei pojjeama.

<sup>20</sup>Miquiana que ca ca Jesosa Quitohua Edojjoshahua Pame huojea canaje. Ohuaya miquianaya ojjaña Jesosa Quitoja esohui e'e nei ba mee canaje.

<sup>21</sup>Jesusaja esohui e'e nei miquianajaya ebajojo eyaya jiquio esohui miquiana huasijje tehueaña. E'e, miquianajaya eba sijjepojji cuana Jesusaja epeeji pojjeama. <sup>22</sup>Sijjepojji cuaa aje oe jama huohuime acani ba'a: —Jesosa ca ca oma Eyacuiñajjija huojea'yo ojjaña jaahuanajji pojjeama, Quito pojjeama.

Ojjaña joya jamaya Jesusajo poani aje oe Jesosa Quito Eyacuiñajjija Bacua Ejja pojjeama poso acani. Jamajjeya ohuaya Eyacuiñajji, eseja Chii nei cajaa acani pea'ai. E'e, oya cuana aje oe Jesosa Quito cuiapanajji poani. <sup>23</sup>E'e, ojjaña joya Jesosa Quito Eyacuiñajjija Bacua Ejja pojjeama poso ajji poani Eyacuiñajji nijje jjapeequi ajja pea'ai. Joya Eyacuiñajjija Bacua Ejja nijje jjapeequiani Jesosa nijje ca ca eseja Chii nei eyajo ani nijje pea'ai jjapeequiani.

<sup>24</sup>Jamajjeya esohui quea pame nee Jesusajo, ma miqiaa shajja'ajja cooa poa ja'a pajea'yojji! ¡Jamaya atiiticue! E'e, ma esohui pajea'yo ajjajo miqianaya Eyacuiñajjija Bacua Ejja nijje jjapee tiitiquije'yo Jesusa nijje. Eyacuiñajji eseja Chii nei nijje jjapee tiitiquije'yo pea'ai. <sup>25</sup>E'e, yahuajo nei ecuana nijje nequiahuaa Jesusa Quitohua huohui ca poa jama ba'a: —Eyaya miqianaya, ecuea epeeji cuana ba'e tiiti meeje'yo enijje eyajo —jamaya ecuana huohui ca poa Jesusaa.

<sup>26</sup>Ecuea epeeji cuana, eyaya jiquio esohui e'e nei tehuenaje miqiana huasijje siajjepojji cuanajo, ma Jesusa cuiapanajji epo cuanajo. Poquiquehua mee ca chana' mi. <sup>27</sup>Miqiana que ca ca Jesusa Quitohua Edojjoshahua Pame huoojea ca'yonaje. Oya, Edojjoshahua Pame miqiana nijje nequi tiitiiani. Ohuaya miqianaya Jesusaja esohui ba meesahua cani quea ja'a nee. Jamajjeya pea esohui huohuijji chamajo jamatii Edojjoshahua Pameya miqianaya ojjaña Eyacuiñajjija esohui e'e nei ba meesahua cani quea ja'a nee. Oya siajjepojji pojjeama. Jamajjeya jodaya esohui cuana jayojja jama ba'ecue Jesusa Quito nijje ejjapee tiitiqui'yojji!

### Jesusaja epeeji cuana

<sup>28</sup>Jamajjeya ecuea epeeji cuana, ¡Jesusa Quito nijje jjapee tiitiquicue bicho'ama epojji! Jamajjeya Jesusa Quito poe o'oyajo ojo eseya mete'ama poaje. Ohua coja ba neinei cajje eseya bicho'ama poaje'yo. <sup>29</sup>Miqianajaya eba Jesusa Quito mimishi'ama, quea pame nee nee. Jamajjeya ojjaña joya mimishi'ama, quea pame nee nee ba'yani Jesusaja epeeji cuana poani.

**3** <sup>1</sup>¡Jjashahuabaquicue! Eseja Chii nei Eyacuiñajjija eseya quea jea nee nee acani. Jamajjeya ohuaya jama acanaje ba'a: —Eyaya miqianaya ecue bacua cuana po meenaje —jamaya acanaje ohuaya.

E'e, ohuaya eseya oja bacua cuana po mee ca'yonaje. Jamajjeya pea cuana Jesusa nijje jjapeequi sa po ajjajo ese nijje jjapeequi ajja pea'ai.

<sup>2</sup>Ecuea epeeji cuana, jjeya eseya Eyacuiñajjija bacua cuana. Jamatii quijje ¿ae jayojja eseya poaje'yo? Maya esejaya ba jjima jjeya. Jamatii esejaya eba Jesusa Quito poe o'oyajo eseyaya oya baje ecojjaa. Jamajjeya eseya jjashahuabaquiani jama ba'a: —E'e jojo nei Jesusa Quito poe o'oyajo eseya o jayojjaya nei nei poaje'yo.

<sup>3</sup>Quea pame nee nee Jesusa. Ojjaña joya jama jjashahuabaquime po'ani tii Jesusa Quitojo jja'ishoa'ajjaquiani. Mimishi cuana pajea neinei ca'yani pea'ai. Quea boejea ba'yani Jesusa Quito jayojja epo'yojjiya.

<sup>4</sup>Shajjama' cuaa ca ca mimishi acanijo Eyacuiñajjija ejjashahuabaquijji quea pame nee jayojja jama po ajja. E'e, jamajjeya Eyacuiñajjija esohuijo jjashajja'ajjaqui ajjaje quea mimishi poani. <sup>5</sup>Esejaya eba Jesusa Quito mimishi'ama nei nei. Oya poeyanaje eseja mimishi cuana cuijea'yohua.

<sup>6</sup>Jamajjeya Jesusa Quito nijje jjapeequi'yo majje eseya mimishi amaja sa po'yo ajja; pajea'yaña seya. Ojjaña joya mimishi atiiti sa poani ca ca Jesusa Quito nijje jjapeequi jjima, ojaya ba jjima, de.

<sup>7</sup>Ecuea epeeji cuana, ¡quea ja'a nee jjashahuabaquicue pea cuanaja miquianaya edasiajji pojjeama! Jesosa Quito quea pame nee nee, mimishi'ama. Jamajjeya ojjaña joya Jesosa Quito jayojja mimishi'ama ba'yani oya cuana quea pame nee pea'ai poani. <sup>8</sup>Joya mimishi ahuicha'a huicha'ajji poani ca ca eshahuaja epeeji poani. E'e, Edosiquiana nei yahuajo nei nei yaña poa meshijo. Ohuaya mimishi acoo ca poa. Eyacuiñajjija Bacua Ejja Jesosa ca ca meshi yasijje poeyanaje ojjaña cuana mimishi pajea mee'yohua, eshahua cuana quea nee nee po meeya, eshahuaja epeeji cuana pea'ai.

<sup>9</sup>Eseya, Eyacuiñajjija bacua cuana ca ca oe mimishi atiitii sa po'yo ajja, Edojjoshahua Pameya ecuana huasijje edobiquinequiya eyacua po mee cani. E'e, ohuaya eseja Eyacuiñajjija ejjashahuabaquijji jayojja jama jjashahuabaqui mee cani. Jamajjeya eseja Eyacuiñajjija bacua po majje mimishi epo maja'yojji pojjeama. <sup>10</sup>Jamajjeya eseyaya Eyacuiñajjija bacua cuana baña jama ba'a: Ojjaña joya mimishi a sa po'yo ajja, Eyacuiñajjija esohui jayojja jama ba'yani Eyacuiñajjija bacua cuana. Ojjaña joya mimishi atiitijji poani, pea cuana quea jea a'ajja pea'ai, Jesusaja epeeji cuana nijje jjapeequi ajja pea'ai ca eshahuaja epeeji cuana, Edosiquianaja bacua cuana.

### **¡Pea cuana oe quea jea nee ejja'aqui!**

<sup>11</sup>E'e ecuea epeeji cuana, ¡pea cuana oe quea jea nee nee ejja'aqui! Jamaya yahuajo onijje jjapeequi jeahuajo Jesusaa eseja huohui coo ca poa. <sup>12</sup>Jamajjeya ¡a'a Adanaja bacua Caini jayojja jama pojji! Oya eshahuaja epeeji poa. Jamajjeya oja chahua sapa cuiahuejjajea ca'ya poa. E'e, oja chahua quea pame poanajejojo Caini onijje quea quene nee poa; quea mimishiya jjejojya oja chahua cuiahuejjajea ca'ya poa. <sup>13</sup>Jamajjeya oya jayojjaya Jesusaja epeeji pojjeamaja miquianaya boti'ama pea'ai acajje a'a jjashahuabaquijji jama ba'a: —¿Apiojji shai eya onajaya boti'ama?

Oya cuana eshahuaja epeeji cuana, Caini jayojja. Eseja ca ca Jesusaja epeeji, echahua mese jayojja. Jamajjeya ese nijje quea quene nee poani.

<sup>14</sup>Eseyaya Jesusaja epeeji cuana quea jea nee nee añ. Jamajjeya esejaya eba e'e jojo nei eseja pea jjashahuabaquime poani, yahuajo jama pojjeama. Jamajjeya eseja Eyacuiñajji nijje ba'e tiitijje'yo eyajo; cuaqui yasijje epoqui'yojji pojjeama. Joya pea cuana quea jea a'ajja ca ca quea nee nee poaje'yo, cuaqui yasijje poquije'yo tii tii pea jjashahuabaquime po'yo jjima jjejojo. <sup>15</sup>Joya pea cuana nijje quea quene nee nee poani aje oe pea quecuajji poani. Eseyaya eba pea quecuajji cuana eshahua nijje jjapeequiani tii; oya cuana eba'e tiitijje'yoyji pojjeama eyajo.

<sup>16</sup>Jesosa Quito esejo mano'ya poa eseja mimishi cuijea'yoyji. Jamaya esejaya eba e'e jojo nei eseja ojaya quea jea nee nee. Jamajjeya ¡Jesusaja epeeji cuana quea jea nee nee ejja'aqui pea'ai; oya cuana ejjaba'e meesahuaku! <sup>17</sup>Epeeji quea deja taiya ca ca quea aquiana huisohua ojaya epeeji aema' nei nei ba majje aquiana quia jjima acani; quea mano jaa, quea shoe nee ba majje jjashahuabaqui

ajja, ba'e meesahua sa po'yo ajja ojaya quea jea pojjeama jojoya. Jamajjeya oya Eyacuiñajji jayojja jama po ajja Eyacuiñajji ojaya quea jea pojjeama jojoya. <sup>18</sup>Ecuea epeeji cuana, ¡shajja'ajjacue mo! Pea cuana esejaya quea jea nee poanijo joya cuana quea pame nee nee ejjaba'e meesahuqui! Jamaya quea pame nee. Eseyaya pea cuana quea pame ajjimajo ca ca jama siajje pome se poani ba'a: —Pea cuana ca ca ecuea quea jea nee poani —jama siajje pomeya se poani.

**¡Pea cuana quea jea ejja'aqui Eyacuiñajji bicho'ama epojji!**

<sup>19</sup>E'e, Jesosaja epeeji cuana quea jea nee eseyaya añajo Jesosaja esohui e'e nei jayojja jama ba'yani, Jesosa nijje jjapeequiani quea pame nee nee pea'ai. Jamajjeya Eyacuiñajji cojja nei nequi majje bicho'ama eseyaya poaje'yo. <sup>20</sup>E'e pojja'a eseyaya quea yeno jjashahuabaquiani jama ba'a: —Eseyaya Eyacuiñajji eba nei nei. Ojaya eya eba quea mimishi poanaje —jamaya pojja'a poani.

¡Bacue! Eyacuiñajjiya eseyaya mimishi cuijea ca poqui yani. Jamajjeya ¡yeno'ama pocue! <sup>21</sup>E'e epeeji cuana, eseyaya ejjashahuabaqui jama ba'a: —Eya Jesosa nijje jjapeequiani. Jamajjeya Eyacuiñajjiya ecuea mimishi cuijea ca'yonaje. Enijje quea bei poani.

Jamaya e'e jojo nei poanijo eseyaya bicho'ama poani Eyacuiñajji nijje emimiji. <sup>22</sup>E'e, Eyacuiñajji esohui jayojja jama eseyaya añajo, Jesosa nijje jjapeequianijo pea'ai Eyacuiñajji quea bihui nee ese nijje poaje. Jamajjeya onijje mimiajo ohuaya eseyaya shajja'ajja caje. Ma ecua eseyaya onijje miminaje jamaya ohuaya acaje.

<sup>23</sup>E'e, Eyacuiñajjiya eseyaya huohui ca poa jama ba'a: —¡Ecue Bacua Ejja Jesosa Quito nijje jjapeequicue! ¡Jesosaja epeeji cuana quea jea nee nee acue pea'ai! —jamaya ohuaya eseyaya huohui ca poa.

<sup>24</sup>Ojjaña joya Eyacuiñajji esohui jayojja jama ajji poani Eyacuiñajji nijje jjapeequiani. Eyacuiñajji ona nijje jjapeequiani pea'ai. Eyacuiñajjiya Edojjoshahua Pame huoojea canaje ese que dobiquiya. Ohuaya eseyaya ba mee cani Eyacuiñajji ese nijje nequi.

**Jesosaja epeeji nishohua mi dasia ca chana'**

**4** <sup>1</sup>Ecuea epeeji cuana, ¡ojjaña esohui huohuijji cuanaja esohui a'a shajja'ajjajji! Chojja, beca cuana Edojjoshahua Pameja huoojea'yo pojjeama, esohui huohuijji nisho. Jamajjeya ¡ojjaña cuana ba neineicue! Quea ja'a nee jjashahuabaquicue jama ba'a: —¿A'a oya cuana Eyacuiñajji esohui e'e nei jayojja jama huohui cani?

E'e, quea huiso siajjepojji cuana ojjaña huasijje poquiani. Siajje poani jama ba'a: —Eyacuiñajjiya eya huoojea canaje ojaya esohui huohuiya.

<sup>2</sup>Jamajjeya Eyacuiñajji esohui huohuijji e'e nei miquea eba poaje jama ba'a: Edojjoshahua Pameya oya cuana huohui meesahua caje jama ba'a: —Jesosa Quito ese jayojjaya yamijji poeyanaje.

Jamajjeya jamaya ohua huohui cajo miquea eba oya cuana Edojjoshahua Pameja huoojea'yo esohui huohuijji poani.

<sup>3</sup>Pea cuaa ca ca esohui huohuijji nishohua jamaya huohui ajja. Chojja, oya cuana siajje poani jama ba'a: —Jesosa Eyacuiñajjija huoojea'yo ojjaña jaahuanajji pojjeama. Eyacuiñajjija Bacua Ejja meshi yasijje poe jjima dejja jayojja yamijji —jamaya huohui canijo aje oe miqianajaya eba oya cuana esohui huohuijji nisho, Jesosa Quito quecuajji nisho epo. Eyacuiñajjija oya cuana huoojea jjima.

Yahuajo eyaya miqianaya huohuinaje oya cuana poeje. Jjeyahua nei oya yani quea huiso. Ojjaña huasijje poquinaje jjadasiaquiya.

<sup>4</sup>Ecuea epeeji cuana, miqianaya ca ca Eyacuiñajjija bacua cuana poanaje. Jamajjeya ohuaya miqianaya dasia mee jjima acani Jesosaja epeeji pojjeama cuana. Miqianaya ona jeabichajeajji jayojja jama poani. E'e, Eyacuiñajjija Edojjoshahua Pame miqianajo nequi ca ca oe quea ca'a nee nee. Eshahua cuana, Edosiquiana quea ca'a pishana. Eshahuaa miqianaya quea mimishi po mee'ajja cani. <sup>5</sup>Esohui huohuijji nisho cuana eshahua nijje jjapeequianiya jjejojo Eyacuiñajjija esohui jayojja jama huohui ajja. Eba'ejji quea mimishi onaaya quea boti nee nee acani. Dejja mimishiya jayojjaya huohui cani. Jamajjeya mimishi cuaa oya cuana shajja'ajja cani. <sup>6</sup>Eseya ca ca Eyacuiñajjija bacua cuana poani. Jamajjeya Jesosaja epeeji cuana Eyacuiñajji nijje jjapeequiani pea'aiya jjejojo esejaya esohui shajja'ajja cani. Pea cuana Jesosaja epeeji pojjeama ca ca Eyacuiñajji nijje jjapeequi sa po'yo ajja; ecuanajaya esohui shajja'ajja sa po'yo ajja. Jamajjeya Jesosaja epeeji nei esejaya eba; ohuaya esejaya esohui shajja'ajja cani. Pea cuana, eshahuaja epeeji cuana esejaya eba pea'ai; oya cuana esejaya esohui shajja'ajja sa po'yo ajja.

### Ojjaña Eyacuiñajjija quea boti nee poani

<sup>7</sup>Epeeji cuana, miqianaya ecuea quea jea nee poani. Ojjaña cuana Eyacuiñajjija quea jea nee nee poani. Jamajjeya pea cuana quea jea nee nee eja'aqui tii tii. E'e, jamajjeya eseya Eyacuiñajjija bacua poanijo o jayojja jama poani. Pea cuana quea jea nee nee eja'aqui Jesosa nijje jjapeequianijo. <sup>8</sup>Ojjaña joya pea cuana boti'ama poani ca ca Eyacuiñajji nijje jjapeequi ajja, Eyacuiñajji ba po jjima pea'ai. E'e, Eyacuiñajjiya ojjaña cuana quea jea nee acani tii tii. <sup>9</sup>Eseya cuana ojaya quea jea nee nee. Jamajjeya ohuaya oja Bacua Ejja oe nei Jesosa huoojea ca poa ese que, jiquio meshi yasijje. Jama ohua acanajejoya, ojjañaja eba eseya Eyacuiñajjiya quea jea nee nee acani. E'e, Jesosa ese que poeyanaje eseja mimishi cuana cuijea'yohua. Jamajjeya eseya onijje ba'e tiitii mee caj'e'yo eyajo quea pame nee nee. <sup>10</sup>¡Bacue! Yahuajo nei esejaya Eyacuiñajji boti'ama poa. Jamatii ohuaya ca ca oe ebionei eseya quea jea nee aca poa. Jamajjeya ohuaya ojaya Ebacua Ejja Jesosa Quito huoojea ca poa ese que, mano'yohua eseja mimishi cuijea'yojji sosejje. <sup>11</sup>Ecuea epeeji cuana, Eyacuiñajjiya eseya quea jea nee nee acanaje; jamajjeya ipea cuana quea jea nee nee eja'aqui! <sup>12</sup>Yahuajo, jjeja nei pea'ai esejaya Eyacuiñajji ba jjima ecojjaja. Jamatii esejaya ojaya epeeji cuana quea jea poanijo tii Eyacuiñajji ese nijje nequiani. Ohuaya eseya pea cuana quea jea nee nee po meesahua cani. Jamaya Eyacuiñajji sa poani.

<sup>13</sup>E'e, Eyacuiñajjiya Edojjoshahua Pame ese que dobiquiya huoojea canaje. Jamajojoya Edojjoshahua Pameya eseya ba meesahua cani Eyacuiñajji ese nijje nequiani, eseya onijje jjapeequiani pea'ai.

<sup>14</sup>Epeeji cuana, eyaya Jesosa banaje ecojaa. Jamajjeya ojjaña huasijje jama huohuimeya aña. Eseja Chii nei eyajo aniya oja Bacua Ejja Jesosa huoojea canaje meshi yasijje mano'yohua, ojjaña cuana ojjaña meshijo ba'eca cuanaja mimishi cuana cuijea'yohua onijje eyajo eba'e tiitii mee'yojji. <sup>15</sup>Jamajjeya eseyaya jama huohuime aña ba'a: —Jesosa Eyacuiñajjiya Bacua Ejja oe nei.

Ojjaña joya jama poaniya e'e jojo nei Eyacuiñajjiya bacua cuana poani. Eyacuiñajji onijje nequiani pea'ai. <sup>16</sup>Esejaya eba e'e jojo nei Eyacuiñajjiya eseya quea jea nee nee acani.

Eyacuiñajjiya ca ca oe ojjaña quea jea nee nee acani. Jamajjeya ojjaña joya pea cuana quea jea nee nee aiji poani pea'ai ca ca oe Eyacuiñajji nijje jjapee neineiquiani. Eyacuiñajji ma dejja cuana nijjeya nequiani pea'ai. <sup>17</sup>Jamajjeya Eyacuiñajji esejaya quea jea nee nee poanijo pea cuana quea jea nee nee ejja'aqui Jesosa Quito jayojja jama epojji. Jamajjeya eseya bicho'ama poaje Eyacuiñajjiyo. Jesosa Quito poe o'oya majje ohuaya ojjaña eseya sosequia caje'yo ma eseya meshijo ba'eya anaje sosejje. Shajjama' cuana ca ca ohuaya quea nee nee po mee caje'yo. Ojaya epeeji quea pame nee cuana ca ca ohuaya ba'e tiitii mee caje'yo onijje eyajo. <sup>18</sup>Esejaya eba Eyacuiñajji, pea cuana pea'ai esejaya quea jea nee nee poanijo eseya mete'ama nei nei poaje. E'e, Eyacuiñajji esejaya quea jea neejajo eseya jjashahuabaquiani jama ba'a: —Eyacuiñajji enijje quea tecue epojji pojjeama.

Jamajjeya mete'ama poani. Ojjaña joya Eyacuiñajji quea jea a'ajja ca ca quea mete poani. Jjashahuabaquiani jama ba'a: —Eyacuiñajji enijje quea tecue nee nee poaje —jamaya jjashahuabaquianijo Jesusaja epeeji pojjeama poani. <sup>19</sup>E'e, yahuajo nei nei Eyacuiñajjiya Jesusaja epeeji pojjeama cuana quea jea nee nee acanaje. Jamajjeya Eyacuiñajji quea jea nee nee ejja'aqui, pea cuana eseyaya quea jea nee nee ejja'aqui pea'ai. <sup>20</sup>Beca cuana jama poani ba'a: —Ecuea Eyacuiñajji quea jea nee nee.

Jamatii oya cuana Jesusaja epeeji cuana quea jea nee a'ajja. Jamajjeya oya cuana siajje poani. Pea cuana cojja ba majje boti'ama acani. Jamajjeya ojaya Eyacuiñajji quea jea nee e'ajji pojjeama ca ba jjima ecojjaja.

<sup>21</sup>Eyacuiñajjiya eseya huohui ca poa jama ba'a: —Eya, Eyacuiñajji miqianajaya quea jea nee nee poanijo ¡pea cuana quea jea nee acue pea'ai!

### Jesosaa eseya Edosiquiana jeabichajea mee cani

**5** <sup>1</sup>Ojjaña Jesusaja epeeji cuana jjashahuabaquiani jama ba'a: —Jesosa Eyacuiñajjiya huoojea'yo ojjaña jaahuanajji.

Eseya jamaya jjashahuabaquianijo, Eyacuiñajjiya eseya oja bacua cuana po mee cani. Ojjaña joya Eyacuiñajji, esejaya Chii nei eyajo ani quea jea nee nee aiji

poani Eyacuiñajjija Bacua Ejja Jesosa quea jea nee ajji poani pea'ai. <sup>2</sup>Oya jayojjaya Eyacuiñajji esejaya quea jea nee neejo, ojaya esohui jayojja jama poanijo pea'ai esejaya eba jama ba'a: Ojjaña Jesusaja epeeji cuana, Eyacuiñajjija bacua cuana esejaya quea jea nee poani. <sup>3</sup>Eyacuiñajji e'e jojo nei esejaya quea jea nee poanijo jiquio ecua ojaya esohui etehue'yo cuana jayojja jama poani. Ohuaya eseya jamaya ameesahua canijo, ojaya esohui cuana camaja'ama. <sup>4</sup>E'e, eseya Jesosa nijje jjapeequiani. Jamajjeya eshahuaja epeeji cuana mimicuijajanobiajeaña. Eyacuiñajjija bacua cuana poanijo eseyaya mimishi cuana mimicuijajanobiajeaña. Mimishi'ama ba'e mee aña pea'ai. <sup>5</sup>E'e jojo nei Jesosa Eyacuiñajjija Bacua Ejja oe nei. Jamaya jjashahuabaquianijo, onijje jjapeequianijo eseya mimishi'ama ba'eje. Eshahuaja epeeji cuana mimicuijajanobiajeaña pea'ai.

### Ehuohui'yo Jesosa Quitojo

<sup>6</sup>Jesosa Quito meshi yasijje poeyajo, Huaniya oya enajo besa mee ca poa Eyacuiñajjijo. Majoya ojaya ena' cuayaquaijo Jesosa mano'ya poa eseya mimishi cuijea'yojji sosejje. Jamaya Edojjoshahua Pameya huohui ca poa Jesosa Quitojo. Ojaya esohui Jesusajo e'e nei poani. E'e, Edojjoshahua Pame siajje po ajja nei nei. <sup>7</sup>E'e, pea beca peejjimaa eyajo nequiya jamaya huohui cani Jesosa Quitojo. E'e, Echii neiya, Ebacua Ejjaa, Edojjoshahua Pameya pea'ai, mahuisohuaya oya jayojjaya huohui cani Jesosa Eyacuiñajjija Bacua Ejja. <sup>8</sup>Jiquio meshijo pea'ai pea beca peejjimaa Jesosa Quitojo huohui cani pea'ai. E'e, Edojjoshahua Pameya jamaya huohui cani Jesusajo. Peaa Jesosa besa mee cajo Eyacuiñajjiya huohui ca poa jama ba'a: “Jesosa ecuea Ebacua Ejja quea jea nee nee” aca poa. Jesosa mano'yajo ojaya ena' cuayaqui'yonajejo pea'ai ojjaña jama aca poa ba'a: “Oya Jesosa e'e jojo nei Eyacuiñajjija Bacua Ejja nei” poa. Mahuisohuaya oya jayojjaya Jesosa Quitojo huohui cani. Jamajjeya esejaya eba e'e jojo nei Jesosa Eyacuiñajjija Bacua Ejja. <sup>9</sup>E'e, dejja cuanaja Jesosa ba neinei jjima. Jamatii onajaya esohui eseyaya shajja'ajjaña. Eyacuiñajjija esohui Jesusajo ca ca e'e nei nei. ¡Maya oe ejjashajja'ajja neineiqui! Ohuaya yahuajo huohui ca poa jama ba'a: —Jesosa ecue Bacua Ejja.

<sup>10</sup>Jamajjeya ojjaña joya jama poani ba'a: —Jesosa Eyacuiñajjija Bacua Ejja e'e jojo nei —jamaya poanijo Edojjoshahua Pame ese nijje nequi. Jamaya jjashahuabaqui sa po'yo ajjajo ca ca siajje poani jama ba'a: —Chojja, Jesosa Eyacuiñajjija Bacua Ejja pojjeama. Eyacuiñajjiya ecuana siajje aca poa —jama siajje pomeya poani cuana.

<sup>11</sup>E'e, Eyacuiñajjiya eseya huohui canaje jama ba'a: —Eyaya ecue Ebacua Ejja Jesosa hoojeanaje miquiana ba'e tiitii mee'yohua. Onijje jjapeequiajo miquianaya ba'e tiitii mee'yo eyajo onijje —Eyacuiñajji jamaya poanaje.

<sup>12</sup>Jamajjeya oja Bacua Ejja Jesosa nijje jjapeequiajo, Eyacuiñajjiya eseya cuana ba'e tiitii mee caje'yo onijje eyajo. Onijje jjapeequi sa po'yo ajjajo ca se ca Eyacuiñajjija Bacua Jesosa nijje eba'e mee'yojji pojjeama eyajo; quea nee nee poaje'yo tii tii.

### Eba'ejji quea pame nee eyajo

<sup>13</sup>Ecuea epeeji cuana, miquianaya Eyacuiñajjija Bacua Ejja Jesosa nijje e'e jojo nei japeequiani. Jamajjeya eyaya jiquio esohui tehueña miquiana ba meeji e'e jojo nei onijje eba'e tiitii'yojji eyajo. <sup>14</sup>Esejaya eba e'e jojo nei jama ba'a: Eseyaya ojaya ejjashahuabaquijji jayojja jama añajo, Eyacuiñajji eseja Chii nei nijje mimianijo ohuaya eseya shajja'ajja cani. <sup>15</sup>E'e, o jayojjaya jjashahuabaquime poanijo e'e jojo nei Eyacuiñajjiya shajja'ajja caje esejaya emimi onijje. Jamajjeya esejaya emimi onijje jayojja jama ohuaya acaje'yo. Jamajjeya eseya bicho'ama onijje emimijji.

### ¡Esejaya epeeji quea mimishi poanijo mimicue Eyacuiñajji nijje!

<sup>16</sup>Epeeji cuana, Jesusaja epeeji quea mimishi poani ba majje ¡ma epeeji joya oe mimicue Eyacuiñajji nijje oja mimishi cuijea'yojji, o ba'e tiitii mee'yojji! Jamajjeya Eyacuiñajjiya oja mimishi cuijea caje'yo. Pea epeeji cuanajo, coya quea mimishi nee nee po tiitianiyo ecuea miquianaya ehuohuijji pojjeama ojo emimijji Eyacuiñajji nijje jama ba'a: —Eyacuiñajji, ¡a'a ma epeeji quea nee po meeji jamatii quea mimishi atitii canijo! —chojja, ¡a'a jamaya mimijji Eyacuiñajji nijje ma dejjajo! Eyacuiñajjiya joya quea mimishi nee nee ajji poani cuana quea nee nee po mee caje'yo. <sup>17</sup>Eyacuiñajjija esohui jayojja jama a'ajjajo eseya quea mimishi poani. Jamatii mimishi amajje eseya Eyacuiñajji nijje mimi'yajo ohuaya esejaya mimishi cuijea caje'yo. Joya mimishi quea tai nee nee ajji tii tii poani ca ca Eyacuiñajjiya quea nee nee po mee caje'yo.

### Esohui quijjejeje nei tehue

<sup>18</sup>Ecuea epeeji cuana, esejaya eba Eyacuiñajjija bacua cuana, ma ohua quea pame nee po mee ca'yonaje quea mimishi tii tii po'yo ajja, pajea ca'yonaje. Eyacuiñajjija Bacua Ejja, Jesosa Quitohua ojaya epeeji cuana jaahuana cani, nahue cani Edosiquianaja quea mimishi epo mee'yojji pojjeama. <sup>19</sup>Esejaya eba pea'ai eseya Jesusaja epeeji poani, Eyacuiñajjija bacua cuana poani. Pea cuana ca ca eshahuaja epeeji poani. Edosiquiana aje oe ona huoojeajji poani. <sup>20</sup>Esejaya eba pea'ai Eyacuiñajjija Bacua Ejja, Jesosa meshi yasijje poeyanaje. Ohuaya eseya quea ja'a nee nee jjashahuabaqui meesahua cani. Jamajjeya ohuaya eseya Eyacuiñajji e'e nei ba meesahua cani. Jamajjeya eseya Eyacuiñajjija Bacua Ejja oe nei nijje, Jesosa Quito nijje japeequi majje eseya Eyacuiñajjija bacua cuana poani. Jesusaja Chii ca ca oe Eyacuiñajji e'e nei ese ba'e tiitii mee'yojji poani. <sup>21</sup>Jamajjeya ecuea epeeji cuana, ¡a'a eshahua cuana nijje mimijji, eyacuiñajji nisho nijje pea'ai a'a mimijji! Jamaya capoahua.

Mahuiso ecuea esohui. Eyaya, Huani bajjaniya jiquio esohui tehuenaje miquianajaya ebajji. Apoa.